

異
物
志

北
戶
錄

附
校
勘
記



異
物
志

楊孚撰
曾釗輯

中華書局

異物志

漢 南海楊 孚孝元撰

清 南海曾 劍勉士輯

金鄰一名金陳。去扶南可二千餘里。地出銀。人民多好獵大象。生得乘騎。死則取其牙齒。御覽七百九十。

穿胸人。其衣則縫布二尺。幅合兩頭。開中央。以頭貫穿。胸不突穿。御覽七百九十。

西屠國。在海水。以草漆齒。用白作黑。一染則歷年不復變。一號黑齒。御覽七百九十。

按海水疑當作海外。漆齒當作染齒。御覽黑齒國下引異物志曰。西屠染齒亦以放此也。可證此漆爲染之譌。

狼臙國。男無衣服。女橫布帷。出與漢人交易。不以晝市。暮夜會。俱以鼻餵金。則知好惡。御覽七百九十。

按狼臙疑與藝文類聚事類賦引狼臙爲一。然臙御覽音燕。又似別爲一國。故並存之。

貧人齒及目甚鮮白。面體異黑若漆。皆光澤。為奴婢。強勤力。御覽七百九十。

雕題國。畫其面皮。身刻其肌。而青之。或若錦衣。或若魚鱗。御覽七百九十。

烏滸。南蠻之別名。巢居。鼻飲。射翠取毛。割蚌求珠為業。無親戚。重寶貨。賣子以接衣食。若有賓客。易子而烹之。太平寰宇記一百六十四。

烏滸。南夷別名也。其落在深山之中。其種族為人所殺。則居其死所。且同殺主。若有過之者。是與非則仇而殺之。文選吳都賦劉淵林注。

狼臙民。與漢人交關。常夜市。以鼻嗅金。知其好惡。事類賦九。

按藝文類聚卷八十三引。常夜市句。作常夜為市。

扶南國。昔但作大扇。遣人持之。不知人各自用也。事類賦十四。

牂牁者。繫船筏也。其山在海中。小而高。似繫船筏也。俗人謂之越王牂牁。遠望甚小。而高不似山。望之以為一株樹在水中也。御覽七百七十一。

按後漢書四夷傳注引作牂牁船杙也。

漲海崎頭水淺而多磁石。徼外人乘大船皆以鐵葉鑄之。至此關以磁石不得過。

黃泰泉廣東志二十四

黃頭人羣相隨行無常居處其類與禽獸同或依大樹以草被其枝上而庇陰其下髮正黃如掃帚見漢人散人草終不可得也。

御覽七百九十

儋耳夷生則鏤其頭皮尾相連并鏤其耳匡爲數行與頰相連狀如雞腹下垂肩上市食諸紡績爲業。

御覽七百九十

十

交趾有橘官置長一人秩三百石主歲貢御橘。

海錄碎事二十二

按事類賦卷二十七引與此同惟初學記卷二十一引稱楊孚異物志今兩存之。

合浦民善游採珠兒年十餘歲使教入水官禁民採珠巧盜者潛水底刮蚌得好珠吞而出。

藻文類聚八十四

錦鳥文如丹地錦而藻績牙交俗人見其似錦因謂之錦鳥。

初學記二十九

形微大於雉其雌特有文章五色甚

可愛。御覽七百二十八

按藝文類聚。牙交作采文。

木客鳥。大如雀。數千百頭爲羣。飛集有度。不與衆鳥相廁。人俗云木客白黃文者。謂之君長。有翼有綬。飛高而正赤者在前。謂之五伯。居前正黑者。謂之鈴下。紺色而頽雜者。謂之功曹。左脇有白帶似鞶囊者。謂之主簿。長次君後。其五曹官屬。各有章色。廬陵郡東有之。御覽九百二十七

鷓鷯。不生卵而孕。雛於池澤間。又吐生。多者八九。少者五六。相連而出。若絲緒。水鳥而巢高樹枝。或在窟穴之間。御覽九百二十五

按此條與陸佃埤雅稱楊孚異物志文字略同。

鷓鷯。巢於高樹顛。生子未能飛。皆銜其母翼。飛下地飲食。御覽九百二十五

鷓鷯。其形似雌雞。其志懷南。不思北。其名呼飛。但南不北。其肉肥美宜炙。可以飲酒爲諸膳也。御覽九百二十四

黃秦泉廣東志。引作不思北徂。又其名呼飛。作其嗚呼飛。

鳥象雌雞。自名鷓鴣。其去懷南。不思北徂。黃泰泉廣東志五十四。

翠鳥。似鸞。翡赤而翠青。其羽可以為飾。御覽九百二十四。

按章懷太子後漢書賈琮傳注。引楊孚異物志同。班彪傳注。引作可以飾幃帳。

翡。赤色。大於翠。文選李善注十三。

孔雀。形體既大。細頸隆背似鳳凰。自背及尾。皆作員文。五色相繞。如帶千錢。文長二三尺。頭戴三毛長寸。以為冠。足有距。栖遊岡陵。迎晨則鳴相和。御覽九百二十四。

孔雀。其大如雁而足高。毛皆有斑文。采捕得畜之。拍手則舞。御覽九百二十四。

鷓鴣。大如雄雞。色赤或黑。而能鳴。彈射取之。其肉香美。中作炙。御覽九百二十八。

苦鳥。聲如人音。多懷悽愴。海錄碎事二十二。

東北荒中有獸名獬豸。一角。性忠。見人鬪則觸不直者。聞人論則咋不正者。續漢志劉昭注三十。

南方人以獼猴頭爲酢。御覽九百一十。

狢。狢類。露鼻。尾長四五尺。樹上居。雨則以尾塞鼻。建安臨海北有之。鼯大如猿。肉翼若蝙蝠。其飛善從高

集下。食火烟。聲如人號。一名飛生。飛生子故也。東吳諸郡皆有之。文選五劉淵林注。

猱。猱。猱之類。居樹。色青赤。有文。日南九真有之。文選五劉淵林注。

狢。狢。頭形正方。髮長尺餘。皆蒼色。犬類似人。欲有所視。輒搖頭。兩手披髮。不爾則覆障其兩目。衣毛。蟠

蟠。若披狐裘。木居深藏。密伺乃得見耳。御覽九百八。

獼母。狀如猿。逢人則叩頭。小打便死。得風還活。廣韻一。

交趾封溪有猩猩。夜聞其聲。如小兒啼也。文選五劉淵林注。

鬱林大豬。一蹄有四五甲。多膏。買者以鐵錐刺其頭。入七八寸。得赤肉乃動。御覽九百三。

日南多馱牛。日行數百里。太平寰宇記一百七十一。

周留如水牛也。毛青大腹。銳頭青尾。

初學記三十一

蒼毛豕身。角若擔矛。衛護其犢。與虎為仇。

黃臺泉廣東志二十四

麋狼形似鹿而角觸前向。入林則挂角。故恆在平淺草中。逐入林則得之。皮可作履襪。角□□□。南人因以作踞牀。初學記二十五

按入林則得之句。與御覽引同。廣韻作則搏之。角下缺字。後漢書南蠻西南夷傳注。作正四據三字。平

淺草中。後漢書注有肉肥脆香美五字。因以作踞牀。後漢書注作因以為牀。無踞字。

麋狼大如鹿。角前向。有枝下出。反向上。長者四五尺。廣州有之。常居平地。不得入山林。文選五劉淵林注

犀角中特有光耀。白理如線。自本達末。則為通天犀。章懷太子注後漢書三

靈狸一體自為陰陽。列其水道連囊。以酒灑陰乾。其氣如麝。若雜真香。罕有別者。用之亦如麝焉。大觀本草十七

白蛤狸。列其外革囊。以酒灑而陰乾之。其氣如麝。若雜真麝中。鮮有別者。御覽九百八十三

鼠母。頭脚似鼠。毛蒼口銳。大如水牛。而畏狗。水田時有。外災起於鼠。初學記三十一

高魚與鱗相似。與蜥蜴於水上相合。常以二三月。有雌無雄。食其胎殺人。御覽九百四十

鯨魚長者有數十里。雄曰鯨。雌曰鯢。或死於沙上。得之者皆無目。俗言其目化為明月珠。文選五劉淵林注。

朱厓有水蛇。鯨魚出合浦。長二三尺。背上有甲珠文。堅強可以飾刀口。可以為鑪。文選五劉淵林注。

蘆鯀似鱗蝥。而有細文。多膏。肥美。形大如蘆管。本出地中。隨泉浮出。俗名蘆鯀。御覽九百四十。

南方魚多不肥美。惟鮓魚為上。大者長二尺。作鱠炙。尤香而美。御覽九百四十。

懶婦魚。昔有懶婦。織於機中常睡。其姑以杼打之。恚死。今背上猶有杼文瘡痕。大者得膏三四斛。若用照書及紡織則暗。若以會衆寡歌舞則明。太平寰宇記一百六十五。

按海錄碎事引。與此文字略異。此引會衆寡歌舞句。似有誤文。當從海錄碎事作宴會歌舞。

鼉風魚。冬天數千萬頭。共處大窟中。窟上有白氣。或在鼉穴中。皮黑如漆。能潛知數里中空木所在。因風而入空木。化為蝙蝠。其肉甚美。御覽九百四十。

鹿魚。頭上有兩角如鹿。初學記三十。

鮫魚皮。可以飾刀。其子驚則入母腹中。初學記三十。

瑤瑁如龜。生南海。大者如簾條。背上有鱗。鱗大如扇。有文章。將作器。則煮其鱗。如柔皮。廣韻四。

蝦種多蜺。最大中作肺。御覽九百四十三。

蚌似車螯。潔白如玉。文選李善注十二。

蠨蝓子。如蠶子。著草。葉得其子。母自飛來就之。廣韻一。

玉出岷崙。大觀本草三。

火齊如雲母。重沓而可開。色黃赤似金。出日南。文選五劉淵林注。

雲母一曰雲精。入地萬歲不朽。文選李善注十三。

榕樹栖栖。長與少殊。高出林表。廣蔭原邱。孰知初生。葛藟之儔。御覽九百六十。

木有摩廚。生於斯調。厥汗肥潤。其澤如膏。馨香馥郁。可以熬膏。彼州之民。仰為嘉肴。御覽九百六十

大觀本草卷二十二。摩廚子引。有生西域。二月開花。四月五月結實。如瓜許。凡十六字。又馨香馥郁。作馨香穰射。仰為嘉肴。作仰以為儲。未又有斯調國名也。句。

斯調州有木名摩。樹汁如脂。太平寰宇記一百六十四

按此疑即上之摩廚。特脫廚字耳。

栱欄。椶也。皮可作索。枸椽樹也。直而高。其用與栱欄同。栱欄出武陵山。枸椽出廣州。木棉樹高大。其實如酒杯。皮薄中有如絲綿者。色正白。破一實得數斤。廣州日南交趾合浦皆有之。文選五劉淵林注

木蜜名曰香樹。生千歲。根本甚大。先伐偃之。四五歲乃往看。歲月久。樹材惡者腐敗。惟中節堅直。芬香者

獨在耳。御覽九百八十二

大觀本草卷十二引。蜜香蟲名。其葉如栱。

檳榔若筍竹生。竿種之精硬。引莖直上。不生枝葉。其狀若桂。其顛近上。未五六尺間。洪洪腫起。若虺木焉。因拆裂出若黍穗。無花而為實。大如桃李。又棘針重累其下。所以衛其實也。剖其上皮。煮其膚。熱而貫之。

硬如乾棗。以扶留古賁灰并食。下氣及宿食白蟲消穀。飲啖設爲口實。

齊民要術十。

檳榔樹若筍竹生竿。近上未五六尺間。洪腫起如癭木焉。因拆裂出。若麥秀也。無華而爲實。大如桃李。天生棘重累其下。所以禦衛其實也。剖其上皮。煮其膚。熟而實之。堅如乾棗。以夫留古賁并食。則滑美下氣。及宿食消穀。

藝文類聚

八十七

按此與齊民要術引有詳略。故並存之。

古賁灰。牡蠣灰也。與扶留檳榔三物合食。然後善也。扶留藤似木防。以扶留檳榔所生相去遠。爲物甚異。而相成。俗曰扶留檳榔。可以忘憂。

齊民要術十。

椰樹高六七丈。無枝葉。如束蒲在其上。實如瓠繫。在於山頭。若挂物焉。實外有皮如胡盧核。裏有膚白如雪。厚半寸如豬膚。食之美於胡桃味也。膚裏有汁升餘。其清如水。其味美於蜜。食其膚。可以不饑。食其汁。則愈渴。又有如兩眼處。俗人謂之越王頭。

齊民要術十。

按文選吳都賦。劉涓子注引。作飲之可以禦渴。與此引文義正相反。

荔支爲果多汁。味甘絕口。又小酸。所以成其味。可飽食。不可使厭。生時大如雞子。其膚光澤。皮中食乾。則

醃。小則肌核。不如生時奇。四月始熟也。御覽九百七十一。

按齊民要術卷十引。乾則醃作乾則焦。

藤實雖名三藤。或有五六長短四五寸。藤頭之間正巖以正月中熟。正黃多汁。其味少酢。藏之益美。齊民要術

十。

三廉大實。實不但三。食之多汁。味酸且甘。藏之尤好。與果相參。黃泰泉廣東志二十三。

枸櫞實如橘。大如飯筥。皮不香。味不美。可以澆治葛紵若酸漿。齊民要術十。

按太平御覽引作皮有香。與此文義大異。

橘樹白花而赤實。皮馨香。又有善味。江南有之。不生他所。齊民要術十。

按藝文類聚八十引。與此文字少異。

橄欖生南海浦嶼間。樹高丈餘。其實如棗。三月有花生。至八月方熟。甚香。木高大難採。以鹽擦木身。則其

實自落。大觀本草二十三。

桂之灌生。必粹其族。柯葉不渝。冬夏常綠。

藝文類聚 八十九

益智類薏苡。實長寸許。如枳椇子。味辛辣。飲酒食之佳。

齊民要術 十

有木洪直。厥名杭梁。

御覽九百 六十一

梓椌大十圍。材貞勁。非利剛。截不能尅。堪作船。其實類棗。著枝葉重。曝挽垂刻。鏤其皮。藏味美於諸樹。

齊民

要術 十

葇母樹皮有益。狀似楸欄。但脆不中用。南人名其實為葇。用之當裂作三四片。

齊民要術 十

斯調國有火洲。在南海中。其上有野火。春夏自生。秋冬自死。有木生於其中。而不消也。枝皮更活。秋冬火

死。則皆枯瘁。其俗常冬采其皮。以為布。色小青黑。若塵垢滂之。便投火中。則更鮮明也。

三國志魏書 契松之注 四

按御覽八十二卷。采其皮作采其毛。不及此之確。以木不應稱毛也。

有竹曰簞。其大數圍。節間相去局促。中實滿。堅強。以為屋椽。斷截。便以為棟梁。不復加斤斧也。

御覽九百 六十三

按齊民要術引以爲柱榱。

質營生水邊長數丈圍一尺五六寸一節相去六七尺或相去一丈廬陵界有之始興以南又多小桂夷

人績以爲布葛。文選五劉淵林注。

交趾稻夏冬又熟農者一歲再種。御覽八百三十九

按此條初學記引楊孚異物志無稻冬二字而彼事又引異物志曰交趾一歲再種李善注文選吳郡賦引異物志交趾稻夏熟農者一歲再種皆不如此條之詳明。

交趾草滋大者數寸煎之凝若冰破如博碁謂之石蜜。御覽八百五十七

科藤圍數寸重於竹可以爲杖篾以縛船及以爲席勝於竹也。御覽九百九十五

葭蒲藤類蔓延他樹以自長養子如蓮葦著枝葛間一日作扶相連實外有殼裏又無核剝而食之煮而

曝之甜美食之不饑。齊民要術十

石髮海草生海中石上叢生長尺餘大小如韭葉似蓆莞而株莖無枝以肉雜而蒸之味極美食之近不

知足。御覽一千。

甘藷似芋，亦有巨魁，剝去皮，肌肉正白如脂肪，南人專食以當米穀。齊民要術十。

蒨草樹果，如栟櫚而小，三月採其葉，細破乾之，味近苦甘，并雞舌香食之，益善也。御覽九百七十四。

按廣韻引作葉如栟櫚而小，子似檳榔可食，文選吳都賦劉涓子注，雖不稱異物志，然亦作葉字，則作果字誤也，據廣韻又引字統云香草，則樹字亦誤。

藿香交趾有之，豆蔻生交趾，其根似薑而大，從根中生，形似益智皮，殼小厚核如石榴，辛且香，薑葉大如累氣，猛近於臭，南土人擣之以爲薑，一名藿薑，生沙石中，薑類也，其累大，辛而香，削皮以黑梅并鹽汁漬之，則成也，始安有之。文選五劉涓子注。

餘甘大小如彈丸，視之理如定陶瓜，初入口苦澀，咽之口中，乃更甜美，足味，鹽蒸尤美，可多食。齊民要術十。

芭蕉葉大如筵席，其莖如芋，取鑊煮之，爲絲，可紡績，女功以爲絺綌，今交趾葛也，其內心如蒜，鵝頭生，大如合拚，因爲實房，一房有數十枚，其實皮赤如火，剖之中黑，剝其皮，食其肉，如蜜甚美，食之四五枚可飽。